

古今絕句

六

精衛

帝子銜冤久未平，區區微意欲何成。
情知木石無云補，待見桑田我變更。
戲贈育王虛白長老

白雲山頂病禪師，昔日公卿各贈詩。
行盡四方年八十，却歸荒寺有誰知。

黃河

派出崑崙五色流，一支黃濁貫中州。
吹沙走浪幾千里，轉側尾間無處求。

東江

判句下

二十二

東江木落水分洪，伐盡黃蘆洲渚空。
南澗夕陽煙自起，西山漠漠有無中。
北望

欲望淮南更白頭，杖藜蕭颯倚滄洲。
可憐新月爲誰好，無數晚山相對愁。

驪山

六籍燃除士不磨，驪山如此盜兵何。
五陵珠玉歸人世，却爲詩書發冢多。

縣舍西亭

山根移竹水邊栽，已見新篁破嫩苔。



可惜主人官便滿無因長向此徘徊
二

主人將去菊初栽落盡黃花去却迴
到得明年官又滿不知誰見此花開

鐵幢浦

憶昨初爲海上行日斜來往看潮生
如今身是西歸客迴首山川覺有情

臨吳亭作

補穿葺漏僅區區志義殊嗟士大夫
欲致太平非一日漫勞使者報新書

蘇州道中順風

北風一夕阻東舟清曉飛帆落虎丘
運數本來無得喪人生萬事不須謀

送僧惠思歸錢塘

淥淨堂前湖水淥歸時正復有荷花
花前亦見餘杭姥爲道僊人憶酒家

松江

來時還似去時天欲道來時已惘然
祇有松江橋下水無情長送去來船

秋日

莫言草木未知秋，今日風雲已自愁。
獨傍黃塵騎一馬，行看蕭索聽颼颼。
中秋夕寄平甫諸弟

浮雲吹盡數秋毫，燦燦金波滿滿膠。
千里得君詩挑戰，夜壇誰敢將風騷。

靈山

靈山寧與世爲仇，斤斧侵凌自不休。
水玉比來聞長價，市人無數起相讎。

荷華

亭亭風露擁川坻，天放嬌饒豈自知。

荆石

二十四

一舸超然他日事，故應將爾當西施。

殘菊

黃昏風雨打園林，殘菊飄零滿地金。
攬得一枝猶好在，可憐公子惜花心。

竹窻

竹窻紅蕚兩三根，山色遙供水際門。
只我近知牆下路，能將屐齒記苔痕。
出定力院作

江上悠悠不見人，十年塵垢夢中身。
慇懃爲解丁香結，放出枝間自在春。

寄育王大覺禪師

山木悲鳴水怒流，百蟲專夜思高秋。
道人方丈應無夢，想復長吟擬慧休。

送僧遊天台

天台一萬八千丈，歲晏老僧攜錫歸。
前程好景解吟否，密雪亂雲絨翠微。

次韻張仲通水軒

池雨含煙暝不收，草根長見水交流。
愛君古錦囊中句，解道今秋似去秋。

送陳令

長谿流水碧潺潺，古木蒼藤暗兩山。
把臂道人今在否，長官白首尚人間。

無錫寄正之

徙席高檣送病身，亂山荒隴障歸津。
應須一曲千迴首，西去論心更幾人。

漫成

清時無路取封侯，疾病卧牛衣已數秋。
日月不膠時易失，感今懷昔使人愁。

初晴

一抹明霞黯淡紅，瓦溝已見雪花融。

前山未放曉寒散猶鏤白雲三兩峯

釣者

釣國平生豈有心解甘身與世浮沈
應知渭水車中老自是君王著意深
將次鎮南

豫章江面朔風驚浩蕩帆船破浪行
目送家山無幾許千年空想蟋蟀聲
出金陵

白石岡頭草木深春風相與散衣襟
浮雲映郭留佳氣飛鳥隨人作好音

三八 酬王微之

二十六

酬王微之

一雨迴颺助蓐收炎曦不復畏金流
君家咫尺堪乘輿想岸烏巾對弈秋
題玉光亭

贈僧

傳聞天下此埋堙千古誰分僞與真
每向小庭風月夜却疑山水有精神
紛紛擾擾十年間世事何嘗不強顏
亦欲心如秋水淨應須身似嶺雲閑

嘲叔孫通

馬上功成不喜文，叔孫繇絕共經綸。
諸君可笑貪君賜，便許當時作聖人。

和淨因有作

朝紅一片墮牕塵，禪客翛然感此辰。
更覺城中芳意少，不如山野早知春。

張工部廟

使節紛紛下禁中，幾人曾到此城東。
獨君遺像今如在，廟食真須德與功。

次韻張仲通見寄

高山流水意無窮，三尺空絃膝上桐。

荆句下

三十七

默默此時誰會得，坐凭江閣看飛鴻。

二

收拾乾坤付一壺，世間無物直錙銖。
醉鄉舊業拋來久，更欲因君稍問塗。

三

歌枕狂歌擊唾壺，直將軒冕等錙銖。
醉鄉歧路君知否，不似人間足畏塗。

宣州府君喪過金陵

百年難盡此身悲，眼入春風祇涕洟。
花發鳥啼皆有思，忍尋棠隸鶴鴿詩。

觀王氏雪圖

崔嵬相映雪重重茅屋柴門在半峯
想有幽人遺世事獨臨青峭倚長松

韓子

紛紛易盡百年身舉世何人識道真
力去陳言夸末俗可憐無補費精神

宰嚭

謀臣本自繫安危賤妾何能作禍基
但願君王誅宰嚭不愁宮裏有西施

郭解

荆句下

三六

藉交雖有不賞恩漢法歸成棄市論
平日五陵多任俠可能推刃報王孫

古寺

寥寥蕭寺半遺基遊客經年斷履綦
猶有齊梁舊時殿塵昏金像兩昏碑

越人以幕養花因遊其下

幕天無日地無塵百紫千紅占得春
野莫自花還自落落落時還有惜花人

二

尚有殘紅已可悲更憂回首祇空枝

莫嗟身世渾無事，睡過春風作惡時。

魚兒

遶岸車鳴水欲乾，魚兒相逐尚相歡。
無人挈入滄江去，汝死那知世界寬。

離鄞至菁江東望

村落蕭條夜氣生，側身東望一傷情。
丹樓碧閣無處所，祇有谿山相照明。

信州迴車館中作

太白山根秋夜靜，亂泉深水遶牀鳴。
病來空館聞風雨，恰似當年枕上聲。

二

山木漂搖卧弋陽，因思太白夜淋浪。
芭蕉一枕西窗雨，復似當時水遶牀。

天童山溪上

溪水清漣樹老蒼，行穿溪樹踏春陽。
溪深樹密無人處，祇有幽花度水香。

鄞縣西亭

收功無路去無田，竊食窮城度兩年。
更作世間兒女態，亂栽花竹養風煙。

寄和甫

水村悲喜坼書看聞道并州九月寒
憶得此時花更好舉家憐汝不同盤

寄伯兄

身留海上去何時祇看春鴻北向飛
安得先生同一飯蕨芽香嫩鱸魚肥

別鄞女

行年三十已衰翁滿眼憂傷祇自攻
今夜扁舟來訣汝死生從此各西東

真州馬上作

身隨飢馬日中行眼入風沙困欲育

荆台下

三十

心氣已勞形亦弊自憐於世欲何營

登飛來峯

飛來山上千尋塔聞說雞鳴見日昇
不畏浮雲遮望眼自緣身在最高層

讀漢功臣表

漢家分土建忠良鐵券丹書信誓長
本待山河如帶礪何緣菹醢賜侯王

月

追隨落日盡還生點綴浮雲暗又明
江有蛟龍山虎豹清光雖在不堪行

金山

怪祕陰靈與護持，重丹復碧煥參差。
滄江見底應無日，萬丈孤根世不知。

疊翠亭

煙籠遠浦迷芳草，日照澄湖浸碧峯。
幸有清樽堪酌酌，忍陪良友不從容。

默默

默默長年有所思，世間談笑強追隨。
蒼髯欲出朱顏去，更覺求田問舍遲。

偶作

未能達本且歸根，真照無知豈待言。
枯木巖前猶失路，那堪春入武陵源。

寓言

太虛無實可追尋，葉落松枝謾古今。
若見桃花生聖解，不疑還自有疑心。

二

本來無物使人疑，却爲參禪買得癡。
聞道無情能說法，面牆終日妄尋思。

偶書

穰侯老擅關中事，長恐諸侯客子來。

我亦暮年專一壑每逢車馬便驚猜

楊子

千古雄文造聖真眇然幽思入無倫
他年未免投天祿虛爲新都著劇秦
讀維摩經有感

身如泡沫亦如風刀割香塗共一空
宴坐世間觀此理維摩雖病有神通
春日即事

池北池南春水生桃花深處好閑行
細思擾擾夢中事何用悠悠身後名

百十五

荆句下

世二

示安師

獨龍岡北第三峯逋客歸來老更慵
敗屋數椽青繚繞冷雲深處不聞鍾
送李生白華巖修道

白華巖主是金僊假作山僧學道禪
珍重此行吾不及爲傳消息結因緣
寄道光大師

秋雨漫漫夜復朝可嗟蔀屋望重霄
遙知宴坐無餘念萬事都從劫火燒
示報寧長老

白下亭東鳴一牛山林陂港淨高秋
新營棗棧我檀越曾悟布毛誰比丘

紅梨

紅梨無葉庇花身黃菊分香委路塵
歲晚蒼官才自保日高青女尚橫陳

鳴

依倚秋風氣象豪似欺黃雀在蓬蒿
不知羽翼青冥上腐鼠相隨勢亦高

驢

力侔龍象或難堪脣比僊人亦未慙

荆白下

三十三

臨路長鳴有真意盤山弟子久同參

二

雖得康莊亦好還每逢溝澗便知難
由來此物非佗物莫道何曾似仰山

代荅陳碧虛

超然便可赴仙期何苦茅山下泊爲
紫府未應無鶴料西城問取我宗支

奉和

下関

故國波濤煙雨間幽亭時見片雲還
危峰疊嶂秀如畫知是江南何處山

二

潮落江風怒不收
昇州一日到真州
綠衣認得經行處
事事傷心欲白頭

荆師下

三

臨川集句

五言

花下

花下一壺酒，定將誰舉杯。
雪英飛舞近，疑是故人來。

春雪

春雪墮如筴，渾家醉不知。
泥留虎鬪跡，愁殺路傍兒。

沈坦之將歸漂陽，值雨留吾廬，久之。

荆句下

三三五

簷雨亂淋幔，風悲蘭杜秋。
相看更促膝，人老自多愁。

二

片雲頭上黑，浙浙野風秋。
室婦歎鳴鶴，分爲兩地愁。

離昇州作

相看不忍發，慘澹暮潮平。
語罷更攜手，月明洲渚生。

七言

送吳顯道

百年多病獨登臺。知有歸日眉方開。
功名富貴何足道。且賦淵明歸去來。

懷元度

秋水纜深四五尺。扁舟斗轉疾於飛。
可憐物色阻攜手。正是歸時君不歸。

二

舍南舍北皆春水。恰似蒲萄初撥醅。
不見祕書心若失。百年多病獨登臺。

三

思君攜手安能得上。盡重城更上樓。

時獨看雲淚橫臆。長安不見使人愁。

招元度

蚤知身是自拘囚。年少何因有旅愁。
自是不歸歸便得。陸乘籃輦水乘舟。

示黃吉甫

三山半落青天外。勢比凌歊宋武臺。
塵世難逢開口笑。生前相遇且銜杯。

送張明甫

觥船一棹百分空。十五年前此會同。
南去北來人自老。桃花依舊笑春風。

贈張軒民贊善

潮打空城寂寞迴，百年多病獨登臺。
誰人得似張公子，有底忙時不肯來。

呂望之將行

江涵秋景鴈初飛，沙尾長檣發漸稀。
惆悵無因見范蠡，夕陽長送釣船歸。

招葉致遠

山挑野杏兩三栽，嫩蘂商量細細開。
最是一年春好處，明朝有意抱琴來。

獨行

朱顏日夜不如故，深感杏花相映紅。
盡日獨行春色裏，醉吟誰肯伴衰翁。

江口

六朝文物草連空，今古無端入望中。
江上晚來堪盡處，參差煙樹五湖東。

戲贈湛源

恰有三百青銅錢，憑君爲筭小行年。
坐中亦有江南客，自斷此生休問天。

與北山道人

可惜昂藏一丈夫，生來不讀半行書。

子雲識字終投閣，幸是元無免破除。

梅花

白玉堂前一樹梅，為誰零落為誰開。
唯有春風最相惜，一年一度一歸來。

即事

漸老逢春能幾回，蓬門今始為君開。
莫嫌野外無供給，更向花前把一杯。

二

一樹籠鬆玉刻成，遊蜂多思正經營。
攀枝弄雪時回顧，還繞櫻桃樹下行。

三

幽棲地僻經過少，鍾梵聲中掩竹門。
唯有多情枝上雪，暗香浮動月黃昏。

四

遮莫鄰雞下五更，願為閑客此閑行。
欲知前面花多處，顛倒青苔落絳英。

五

春光冉冉歸何處，細雨斜風昨夜寒。
猶有數葩紅好在，老年花似霧中看。

沈坦之值雨

天雨蕭蕭滯茅屋冷猿秋雁不勝悲
牀牀屋漏無乾處獨立蒼茫自詠詩
二
簷雨亂淋漫風悲蘭杜秋相看更促
膝人老自多愁

三
片雲頭上黑淅淅野風秋室婦歎鳴
鶴分爲兩地愁

示蔡天啓

蔡子勇成癖能騎生馬駒銛鋒瑩鷗
鵜價重百碑礫脫身事幽討禪龕只
晏如劃然變軒晏慎勿學哥舒

荆句下

三十九

二

蔡子勇成癖劍可萬人敵讀書百紙
過穎銳物不隔開口取將相志氣方
自得偏仄何偏仄未見有一獲蕭條
兩翅蓬蒿下未能生彼升天翼馬能
學堂上燕絢練新羽翮

三

身着青衫騎惡馬日馳三百尚嫌遲

心源落落堪爲將，卻是君王未備知。

本朝絕句下終

荆句下

四



說少日嘗觀山谷老人為同郡
 胡尚書諱直孺以研綾牋寫杜陵
 臨川絕句錯綜間見參以行草
 亦概聞其緒言謂古今絕句造
 微入妙無出二家之右說近歲
 嘗以所聞質諸當代詩匠咸謂
 斯言可信不疑今二集行於世
 者凡一伯二十卷每欲檢尋絕
 句如披沙揀金徒勞緡閱暇日
 掇拾自為一編得杜陵五言七

辨別

言凡一伯三十有二首臨川五
 言六言七言凡六伯十有三首
 日曰古今絕句手寫一本銀木
 流傳以與天下後世有志於斯
 文者共之不敢輒為序引謹以
 所聞附之篇末紹興二十三年
 歲在癸酉三月二十九日錢塘
 吳說題



圖書在版編目(CIP)數據

古今絕句/[宋]吳說輯.—北京:北京圖書館出版社,
2004.6

(中華再造善本)

ISBN 7-5013-2504-9

I.古… II.吳… III.①絕句—唐代—選集②絕句—
北宋—選集 IV.I222.74

中國版本圖書館CIP數據核字(2004)第050864號

ISBN 7-5013-2504-9



9 787501 325047 >

書名 古今絕句(全六冊)
著者 [宋]吳說 輯

出版 北京圖書館出版社(100034 北京市西城區文津街七號)
發行 Tel:(010)66151313 Fax:(010)66174391

E-mail: Bstfxb@publicf.nlc.gov.cn
Website: www.nlcpress.com

造紙 華寶齋
印刷 杭州富陽古籍印刷廠

開本 八
印張 三四·五
版次 二〇〇四年六月第一版第一次印刷
印數 一—二〇〇〇

書號 ISBN 7-5013-2504-9 / K·853
定價 一—一〇圓

